

Kayëte ndënkwëryënkw mba Pol nte kerëhnëka Timote Wade yehëhna hnë inji kayëte

Afayik Pol kerëhnëka Timote vëkayëte vaki do anji ye ndënkwëryënkw ña. Pol kerëk inji kayëte mpëdara hnë bëhn wafëhw mbëd g'iryaw g'imbed (65) ga ndëcëk hnagi Yesu ña, Masedëwan hna.

Timote asan ale hwëtahnëka Yesu Këris yeho. Hnëmu ña Gërek yeho do rëmu ña sëwif yeho. Matiko hnë nkol Lisëter hna (Vantiyehn 16.1) do nke lawo paryi Pol hnë doku lëwu vacery sali hna. Atëko njasëndëni gë Pol do Pol macëdëha aju hn'ikwëtahn hna. Umë wogëko gë Pol bare Pol tamahnëkawo duf. Pol tavëka Timote Efes hna soñe karañëhni vëvë cery sali va.

Soñe ile kerëhnanëka inji kayëte ña umë ye, kabi nkeni vëryampo vële harañëdëhëhni vile wok gena toña va. Anahadëni viyë vile ye duniña vi mek do kodena njiyi g'ambin afo gë uyët ile soñik do g'ikeha inëlël gë virokëtok viryampo. Pol ntehnëk, fop vile ntik Wën va nkwanëk do ndënkwëtehnëdëha Timote karañëdëhni watac vacery sali va.

Kayëte ntëwu ña nësëd viyë vërar: wah-nira vële hwëtahnëk va, vëvë haryënkw vële hwëtahnëk va gë Timote dënk.

Wëlin wanës wakwëhn nafa hn'inja kayëte: ikwëtahn, cery sali, d'uniya, ikaraŋ, Sintani, d'oku, vësëval, vësan, toña.

Wëlin gante nke kayëte ka:

Simpaŋi (1.1-2)

Kwëtëryin hakili gë vële haraŋëd'ëhëhni vahnë wamër va (1.3-20)

Ikaraŋ soŋe iyëfa do vëvë haryënkw cery sali (2.1-4.16)

Ile rëfëka ntini vële hwëtahnëk va (5.1-6.2)

Uwët fërën (6.3-19)

Simpaŋi rëkwa (6.20-21)

1-2 Timote, ami Pol herëhnëryidëhi. Wënu ŋa Afëhët fu ya gë Yesu Këris itamahn dëw fu ŋa vëhni lehnëko yewu afayik Yesu Këris ya do wëjë ye fatah mën paryi hnë ikwëtahn hna. Arabi Wën Rëm ya gë Yesu Këris Ahwëhn fu ya nje'dënihi ipërëna, ikaÿëhnahn gë yam ya!

Kwëtëryin hakili gë vële haraŋëd'ëhëhni vahnë wamër va

³ Gory Efes hna, had gante ntehnëmino ani gë yihahnëryindu gë Masedëwan ka, kabi nkeni hnam vële haraŋëd'ëhëhni vahnë wamër ŋa; dehnëryihni tavëni.

⁴ Dehnëryihni tavëni itëfëta wëhnantul wahwëhn nafa këm g'idëkw vimbaÿ vacërakëlo vële wok vëfudina. Umë gwajëtël fo njojëd, yiryeryëdina gë ikaraŋ Wën ile liya'd hn'ikwëtahn hna.

⁵ Ge ntehnëmi ali koyëna soŋe naÿëni iña nte wâtik hnë sakahn facah hna gë inahan ipërën do g'ikwëtahn paryi ye.

⁶ Vëryampo tavëni nkaŵ tac do tēfēni vankwajēla vakwēhn nafa kēm.

⁷ Vēharaŋ sariya Wēn ñadēni nkeni, bare vëyētēna ile nēsēdēni ŷa, vëyētēna fēna iñē ile njawēnēni paryi ŷi.

⁸ Ha, njētēbun sariya ŷa pērēnak, ge ntiyinēk gante tēfēka ka.

⁹ Tēfēka njēti iŷin: sariya ŷa gena vēsatah linēhnik. Soŋe vële wok vëŵawēhnēdīna gē vële wok vëlēnēnēdīna sariya ŷa, vële wok vëhwēhnana ikwētahn gē vële wēnēd va, vële wok vëlēnēnēdīlahna Wēn gē vile facēk va, vële ryawēdēhēhni warēm hni ma wahnēm hni, vëryaŵ vahnē vëhaŵary fēna,

¹⁰ vële lid ndakēntal nte ñēŵēk Wēn gē vēsān vële ryakēd gē vēsānētahni, vële wafēdēhēhni vēramp, vële wērēd, vële ye wasede hnē wamēr do gē fop vële hwēhna nkeya meh, vile hnēmpēlēk gē ikaraŋ catah ŋa linēhnik.

¹¹ Ikaraŋ tac tēfēlēk gē Wanēs Wakasēk wante hwētēhnanibu, wante ŵatik hnē Wēn hunte lēnēnik, hunte sēmbik.

Icamehn soŋe ipērēna Wēn

¹² Camehnēbuha Yesu Kēris Ahwēhn fu ŷa, umē ale yēdako fanka fa: ha, Ahwēhn a nuko kahnēndaŋbu, umē tēhnako liwu dōku lēŵu ŷa,

¹³ mama nkehahnēbuho kobēri ŋa aŷēŵ alēŵu, ahorotehn do ayapah. Bare kaŷēhnahnēkawo g'ami, kabi kwētahnēlēwawohna do yētēlēwohna ile lidēfuho ŷa.

14 Ha, ipërëna Ahwëhn fu ɲa njabëkowo, nuɣabuho ikwëtahn ɲa do gë injahn nte hwëhnayinëk, vankinëk gë Yesu Këris.

15 Wëlin wanës toña wante rëfëka kacahnini vahnë fop: Yesu Këris ɲijëk duniya li soɲe pehëtëhni vëwën. Do ami awën asankaf yebu.

16 Bare wëli soɲe ile kaɣëhnahnëka g'ami: Yesu Këris wawëk tufahn hn'ami, awën asankaf a, iduñëna ipadah idëwu ɲa. Koyëna dahëse iduñëna dëwu yebu soɲe vële hwëtahnëdëha va, gante nuɣahnëdëni uwám usër wã.

17 Araɓi untënah gë icëmb nke g'ahnaŵ avë kantëm, gë Wën hunte wok cëmëdina, hunte wok nudëna, hunte wok mëntëlëntina, dol gë kantëm! Amina.

18 Timote, ajë mën, ntehnëmi ali fop wanës watac wante hwëtëhnahnëmi, rëfëlëk gë wanës wante fëyahniko kobëri ɲa soɲe lëw hu ya. Waɲi wanës ɲjawënedëhi do kodu awët uwët fërën wã;

19 kwëtary ikwëtahn hu ɲa do g'inahan ipërën hu ɲa. Vëryampo tavëni watac do koyëna përekanëni ikwëtahn dëw hni ɲa.

20 Hnë vahnë vërac nkentiniho Imene gë Alekësandër; vëhni ɲjëdahnëbuhëhni gë Sintani. Koyëna, ñëɲadëni antë mbok ɲjewëniha Wënu ɲa.

2

Ikaraj soɲe iyëfa

¹ Awa ryënkwëryënkw ÿa ten, ntehnëmu awuntanduna Wënu ña, ayëfanduna, ahëlanduna soñe vëyënta hun va do asamehnënduna soñe vahnë va fop.

² Tëfëka ayëfanëhnënduni vële hnaŵëk gë fop vësankaf va gante nkohahnëden yam, tana këm, kahnëndahnin hnë Wën gë njasa ntënah.

³ Irac ye ile fërënak do hnëñëdëha Wënu ña, Afehët fu,

⁴ ale ÿad vahnë va fop pehëtini do njëtëntini toña ÿa.

⁵ Ha, Wën huɗampo fo ye,

do fëna aryampo fo ye yëbëlan Wënu ña gë vahnë va:

asan ye, Yesu Këris,

⁶ umë ale yëfahnëk ntaŵary dëŵu had icos soñe pehëtëhni vahnë va fop.

Rac ye ucedeya nte liyiko wati le pëhnayiko hna

⁷ do soñe rac, Wënu ña hahnëndëko had afëyahn gë afayik harañëndëŵuhni, vële wok vëyena wasëwif, ikwëtahn ña gë toña ÿa. Toña ÿa nësëdëfu, mërëɗa.

⁸ Awa ñadëfu vësan va fop njëfandëni gante-wo-gante, njelëndëni wëbák wapacah g'ambin, ntavah këm gë sonko këm.

Ikarañ soñe vësëval hnë cery sali

⁹ Koyëna soñe vësëval va fëna, ñadëfu cudandëni gante canëk ka, hara vëryëcëtahnëna, tëfëlahna ntiyandëni viyi soñe tufëhnahnëndëni. Antë ndaÿëndëni vandaÿa

vantakah, do antë kayëtandëni gë sanu, ma wanjere, ma viyi vile hambëka ntaŵ.

¹⁰ Bare tēfëka tufahnëndëni iyiv dëw hni ɲa hnë vantiyehn vapërën gante caɲëkëhni vësëval vële lehnëd Wën tēfalëdëni.

¹¹ Asëval a tēfëka ñëɲand yam fo do gë imawëhn padah.

¹² Maŵëryanëlëwähna asëval karaɲa, ma mëka asan; tēfëka ñëw yam.

¹³ Kaɓi Adam ryënkwiwo ñahani, tac Ev.

¹⁴ Do fëna gena Adam tokako Sintani, bare asëval a yeho, afo nti ile mbañëko Wënu ɲa.

¹⁵ Bare pehëtëde hn'uhnag hna, ge njaŵënëk ikwëtahn ɲa, gë iña ɲa, g'ufacah wã, ge ntid g'useryah.

3

Vësankaf cery sali

¹ Wëlin wanës toña: ge ahnë njëkëlehnëd nke avë karyënkwi cery sali, doku fërën ye ile njëkëlehnëd yi.

² Awa umë tēfëka nke ahnë asatah, nke asan asëval aryampo fo, ale fëlak nkaf ntëwü do seryëk, ale lënëneđe, holëk kaca vahnë do hoɗ karaɲëhni vahnë.

³ Tēfëlahna nke aryëw ma ale wëtëntëde bare tēfëka nke ale nkukëk sakahn do wok yëkëlehnëdina sonko; antë ɲahn dëcët koryi.

⁴ Tēfëka nke ale holëk mënkwi tere lëwü ya do mënkwehni vutah vuntëwü hn'imawëhn, g'untënah fop.

⁵ Age ahnë a kodina mënkwi tere lëwü ya dënk, hak koɗ paɓ cery sali Wënu ɲa?

6 Tëfëlahna nke ale hwëtahnëk takan, soje antë pëba inaÿëna do njo hn'ikitiŋ tac fo gë Sintani.

7 Tëfëka kwëhna untënah gë vële wok vëyentina cery sali soje antë njafini do antë njoni hnë warënd Sintani hna.

Vëyohal cery sali

8 Vëyohal hnë cery sali va fëna tëfëkëhni nkeni vësan vële lënënik do wok vëhwëhnana wanës waki. Tëfëlehniha dëcëtandëni uñen ŋa ma njëkëlehnëndëni koryi gë wafere waŵeh ŵa fop.

9 Tëfëkëhni vahnë vërac kwëtani, gë hakili facah, toña le yëtëndanik hn'ikwëtahn hna.

10 Tëfëka pëcëtayi fëna wapacëk soje njëtahni bi vëhwëhnana ile nirandëni, tac kodëni nkeni vëyohal cery sali.

11 Vësëval va* fëna tëfëkëhni nkeni vële lënënik do tëfëlahna nëwëndënihëhni viÿëntahni, vële yëtëk nkaf ntëw hni do hahnëndak hn'ile-wo-le hna.

12 Vëyohal cery sali va tëfëkëhni ale-wo-le nke asan asëval aryampo fo do tëfëkëhni nkeni vële holëk mënkw vutah vuntëw hni va gë tere lëw hni ŷa.

13 Vële lid g'afërën doku lëw hni hnë cery sali hna ntënëndëni do nuÿadëni itama cankaŋ hn'ikwëtahn nte ye hnë Yesu Këris.

Gante naÿëk ikwëtahn ka

14 Kerëndidëmi waŋi, mama nahandëbu yiryiwu yëkiyi hara biÿëna.

* **3:11 3.11** *Vësëval va:* Kode nkwëryi fëna «vësëval hni va» ye.

¹⁵ Koyëna, ge yinkaryila, njëtëdu gante tēfëka nke njasa hu ña hnë tere Wën hna. Iyi tere, cery sali mba Wën paryi ye nte hagëtëd do famëtëd toña ÿa.

¹⁶ Ha, pacëk, ufëmpëhnah ile yëtik hn'ikwëtahn hna nayëk:
Tufëhnako hn'imbahn,
tufëhnako asatah g'Iyir,
nuniha wamëleka ña,
pëyahniko hnë vële wok vëyena wasëwif,
kwëtahniko duniÿa li,
do kayëndiko yan gë icëmb.

4

Vëharan wamër

¹ Iyir ña nësëk wapacëk: hnë vampëd vatëkwa hna, vëryampo tavëdëni ikwëtahn ña. Wayine wade rokadëhëhni tēfëdëni gë ikaran nte watik hnë Sintani.

² Vahnë vële hurubak, vëwër, vële yëtëdu vintaŵary vidëw hni va gona këncëtëlehnënd yivah gë wëh, wënehnedëhëhni gë wanës wadëw hni ña.

³ Mbañëndënihëhni vahnë va antë ñëlëländëni, do antë tokëndëni viÿë viryampo. Bare Wënu ña ye ale lik a vëÿin fop soje vële hwëtahnëk, yëtëk toña va, tokëdëni camehnatëndëniha Wënu ña.

⁴ Ha, fop ile ntik Wën ÿa përenak do ñoñ gena ile sanëdë ge tebaden camehnatëndënehna.

⁵ Wanës Wënu ña gë wayëfa wã pacënëd vëÿin fop.

Ayohal afërën

⁶ Karañeryindëhni wañi fop vële hwëtahnëk va. Koyëna nkeđu ayohal afërën ava Yesu Këris ale ryavik gë wanës ikwëtahn do gë ikarañ catah nte rëfëru gë ikahnënda.

⁷ Bare cañëтары wëhnantul wakwëhn toña këm, wale hnëmpëlëk g'ikwëtahn. Ñëñary awo ale hahnëndak hn'ikwëtahn Wënu hna.

⁸ Yakën imbahn nëfak bare gena hnë vilewo-vile; bare ikahnënda hn'ikwëtahn Wënu ña nëfak soñe fop. Kabi hnam nke ile ntehnëk Wënu ntinëndëhëfu ÿa hnë iÿi d'uniÿa gë ile yejëk per.

⁹ Wëlin wanës toña wante rëfëka kacani vahnë fop:

¹⁰ Ndokujëden d'us do mëtëden, kabi ale ye Wënu paryi ña ramahninëk, umë ale ye Afehët vahnë fop ÿa, do kas vële hwëtahnëka va.

¹¹ Iÿin ye ile rëfëka aharañëndëhni do alehnëhni vahnë va ntindëni.

¹² Ahnë tëfëlahna njafi kabi fatah woru; bare wëjë gery ale tëfëtalandëni vële hwëtahnëk, gë wanës hu ña, gë nkeya hu ña, gë iñahn hu ña, gë ikwëtahn hu ña do gë ufacah hu wã.

¹³ Rëkahnëryindu ÿa, paßëry ikarañ Wanës Wënu ña hnë bulunda hna, ahamënaÿehnëndëhni do aharañëndëhni.

¹⁴ Antë aryënkwa avalëtahn uyëd va Iyir Ipacah le ye hnë wëjë hna. Nuÿaruho rac ante nësëniho wakila do tindënihino vicër wëbák ña.

¹⁵ Yawënerÿ iÿin fop, paßëry gë fanka hu fa fop iÿi d'oku gante kodëni vahnë va fop nuni unji karyënkwa hu ña.

16 Keryery nkaf hu do g'ile harañëduhëhni vahnë ÿa. Kahnëndary hnë vëÿin fop. Ge koyëna ntiru, pehëtaðu wëjë dënk gë vële hnëpadëhi per.

5

1 Antë ahnirahna g'injañëna acër. Gabëryinda had rëmuh, vëjar va had vëhery hu,

2 vanëm va had wahnëmuh, vucëval va fëna had vëhery hu, g'ipacëna padah.

Vësëval vële cëmaryëk vësan

3 Pabëryihni g'untënah vële cëmaryëk vësan, vële ye paryi vëhni fo va.

4 Ge ale cëmaryëk asan a kwëhnakëhni vutah ma vutah vunte nagëni vërahu, tëfëkëhni vutah vutac nëjani gante tufahnëdëni ten ikwëtahn dëw hni ña hnë watere wadëw hni hna, cosënihëhni vële hnagëkëhni va, kabi umë ye ile hnëjëdëha Wënu ña.

5 Ale cëmaryëk asan a, ale ye minu fo ÿa, Wën hna kwëtëk itama dëwu ña fop; hnë iyëfa gë ikëla hna nked, g'umëd gë g'anent.

6 Bare ale cëmaryëk asan a ale yëkëlend ile hnëjëdëha fo asëm ale wok yasëd ye.

7 Wañi fëna tëfëka aharañëndëhni soñe ahnë antë kwëhna ile niradëhëhni.

8 Age ahnë pabëlëhnhina hnënk lëwu ÿa, do kas vëvë tere lëwu va, njahëtak ikwëtahn ña. Ahnë arac mek ntëbi dënk ale wok kwëtahnëna.

9 Mawëry ahera asëval ale cëmaryëk asan a hnë kayëte vësay hna ge tëkëka wabëhn wafëhw imbëd gë ryaw (60) do ÿëliko hwënta ryampo fo.

¹⁰ Tëfëka njëtëhni vifërën vile ntid va: kwëdä pärën nte kwëdëkëhniwo vutah vuntëwu, kaca ntënah nte kacadëhëhniwo vëhneh, igwiyët wakwër wante nkwiyëtëdëhëhniwo vële hwëtahnëk, idema nte ndemadëhëhniwo vële yiwëhnëk do lidëho gë uyoh fop vantiyehn vapërën va.

¹¹ Bare antë aherëhni vësëval vële cëmaryëk vësan, vële wok vëryag fo va; kabi ge iña dëw hni ña kumpëtëkëhni g'ile kwëtëlëntiniho gë Këris, rëkëdëni ñandëni ñëlini.

¹² Awa koyëna kitiñëdëni menëni, kabi vëyawënenëna wante ntehnënihawo Këris ña.

¹³ Do kat, ñëñadëni nkeni vëhëmak, njasëdëni tere gë tere. Gena vëhëmak fo nkeni bare nësënkëni do pabëdëni ile wok gena wadëw hni; vëhodina pëlani wawës walëw hni.

¹⁴ Soñe rac ñadëfu mbok ñëlini vësay vëryag va, nagënihëhni vutah, pabëni watere wadëw hni ña soñe vëyëw fu va antë nuñani wameh wante ntehnëdënihëfu.

¹⁵ Kabi vësay vëryampo tavëni nkaw catah tëfëniha Sintani.

¹⁶ Age asëval ale hwëtahnëk kwëhnakëhni vële cëmaryëk vësan tere lëwu hna, tëfëka ndemandëhni antë nkeni dïb cery sali ña. Koyëna cery sali ña kod ndemandëhni vële ye paryi minëhni va.

Vële ye haryënk w cery sali

¹⁷ Vële ye haryënk w cery sali do wënk wëd g'afërën doku lëw hni ña, tëfëkëhni wasos wahi, do kas vële hwëhnak wadoku wadënah hn'ipëyahn wanës gë ikarañ vëyënta hni.

18 Kabi Vikerëh va më lehnëk: «Ge yihni ÿa ndokuñëd ant'arëmpuna wës ÿa soñe antë tokënd roka ÿa.»[☆] Do kat: «Aryokuñ a tëfëka cosi.»[☆]

19 Antë aŵaŵëhn ahnë nësënd wameh soñe ale ye ankaf cery sali, ge vēhi ma vērar vēyena waseđe soñe watac.

20 Niraryehna tase vahnë fop ale wëned a soñe vēyëntaŵ va nta Kahnëhni antë ntigëni koyëna.

21 Wëlin ile wuntadëmi ÿa haryënk Wën hna gë Yesu Këris do gë haryënk wamëleka Wënu ña: maŵëhnëry wañi fop, diryihni fop ndampo fo hara dëbëndëlendilihëhnhna vahnë va.

22 Antë ñankahni arinda ahnë wëbák ña, alihna avë haryënk cery sali. Antë ayentahni wameh vēyëntaŵ ña. Gory afacah.

23 Tavëry ice wënka fo bare ceryind fëna uñen toye soñe lav ðonk hu ÿi do gë itesënk hu ñi.

24 Wameh vēryampo nude wapacëk ani gë kitiñahnëndeni ÿa dënk; wëba vēyëntaŵ ña nude ge kitiñini.

25 Do fëna, vantiyehn vapërën va nude wapacëk, do vante wok nuyina tañ va kofina nko coŵa.

6

Vëramp

1 Vële ye hn'utamp va, tëfëkëhni njëdanihëhni ntënah padah vële hwëhnëkëhni va, soñe antë ahnë njew uŵac Wënu ña g'ile harañëdenëhëhni vahnë ÿa.

☆ 5:18 5.18: Divëta Sariya 25.4 ☆ 5:18 5.18: Lik 10.7

2 Vële hwëhnakëhni vësankaf vële kwëtahnëka Wënu ña, vahnë vërac tēfēlēhniha njafēni cankaf ntēw̃ hni ña kabi vëyēnta hni ye. Bare tēfēkēhni ndokuñēhñēndēnihēhni ntēbi kabi vële hnuyad ufērēn w̃a hnē d̃oku lēw̃ hni vële hwëtahnēk ye do vëyahnik Wënu ña. Watac rēfēka aharañēdēhni vahnë va do alehnēdēhni ntindēni.

3 Age ahnë karanjēdēhēhni vahnë wakaŵary, ge maŵēna wanēs wapacah wēba Ahwēhn fu Yesu Kēris ña do ge maŵēna ikarañ nte rēfēlēk gē ikwëtahn ña,

4 ahnë arac inaŷēna ña fēbēka, ñoñ yētēna. Iña ña kobēka gwajētēl gē sonko soñe wanēs. Hnam matidēha iñēw̃ary gē wasonko do gē nēs wameh soñe vëyēntaŵ, vikamahna vimeh,

5 wasonko wale wok puđina yēbēlan vahnë vële tumpak wahakili, wok vëyētēna toña. Ntiyahñēkēhni ikwëtahn Wënu ña fere fale hnuyahnēde hnapul ye.

6 Paryi nke, ikwëtahn Wënu ña hnapul sankaf ye ge nēñkēfu g'ile hwēhnayinēk ŷa.

7 Ñoñ yojilēnēhna hnē iŷi d̃uniŷa, do fēna ñoñ kodēlēnēhna njoyin.

8 Awa ge kwēhnayinēk ile rokēden gē viŷi vile liyaden, umē gwēr nkedēhēfu.

9 Vële yēkēlend uvetak va njēkēhnahnēdeni, warēnd w̃a pēladēhēhni, viña wanēnkwaḥ do wadākēmak ntabēdēhēhni vahnë gē ibēv do janáma hna.

10 Ha, ankahn wameh wayabāh, iña d̃ēcēt koryi ña ye. Vëryampo njēkēlehnēni rac d̃ēcēt,

soŋe rac ɲaŵětani ikwětahn ɲa do njoyajëni vëhni dënk wahorot wayabah.

Uwët fërën

¹¹ Awa, wëjë ale kwëhnëk Wën, garyëry vëyin fop. Yëkëlehnëry usatah, ikahnënda gë Wënu ɲa, ikwětahn ɲa, ɲahñ ɲa, iduñëna ɲa, do gë iguk sakahn.

¹² Mëtëry uwët fërën ikwětahn ɲa. Pëlary uwám usër ule wăcahniru wă, ule yavëtëru hale ntiru ipëyahñ përen ikwětahn hu ɲa tase wasefe wayabah.

¹³ Tase Wën ale yëdfahnëd uwám hnë fop do gë tase Yesu Këris ale rufahnëko ucedeya g'ipëyahñ përen haryënkw Pos Pilat, kwëtehnahnëdëmi:

¹⁴ yaŵëñëry akwëda, nte hnuɣaru ɲa, g'ufacah, idënt këm, hafo mbokaj Ahwëhn fu Yesu Këris.

¹⁵ Mbokajëd hnë wati le kahnëndëk Wën hna, ale lënënik, ale wëkëk fop,

Ahnaŵ vëhnaŵ ɣa do Ahwëhn vëhwëhn ɣa.

¹⁶ Umë fo ye ale wok cëmëdfina ɣa.

Hnë humpen hunte woyinëk təkëñëdelënëhna ntëdëk.

Ahnë nulahna do ahnë kodina nuhna.

G'umë nke ntënah ɲa gë fanka fa kantëm!

Amina.

Ile nkabini vëvetak

¹⁷ Awa wëba vëvetak hnë d'uniɣa li, dehnëryihni antë naɣëñandëni do antë kwëtëni itamahn dëw hni ɲa hnë wavetak le fud, bare

hnë Wën hna, umë ale vetëndayehnëdfëhëfu
hnë ile-wo-le ŷa, soŷe natahnëfu.

¹⁸ Kwëtehnañhëryihni ntindëni vantiyehn
vapërën le yed hnapul lëw hni, kwëhnani nëf,
cahëlëndëni gë vëŷënta hni ile kwëhnani ŷa.

¹⁹ Koyëna kwëtaďëni hnapul fërën le viŷed
soŷe acahn lëw hni gante kodëni kwëhnani
uwám paryi wã.

Simpãŷi rëkwa

²⁰ Awa, wëjë Timote, yaŷënëry đus ile
hwëtehnañhëry ŷa. Kehary fop wanës wakwëhn
nafa këm do wok tëfëlëna g'ikwëtahn ña do
gë wasonko wanëñkwah wale wãtik hn'ile
macëďëni vëryaŷ «Uyët».

²¹ Vële hnahak kwëhnani uyët rac, tavëni
nkaw ikwëtahn ña.

Arabi ipërëna Wënu ña nke gë wühñë.

Wamey
Wamey: Vikerëh Vikasëk Wën gë Wapëgwala (New Testament+)

copyright © 2018 Wycliffe Bible Translators, Inc.

Language: Wamey

Contributor: Wycliffe Bible Translators, Inc.

All rights reserved.

2025-04-30

PDF generated using Haiola and XeLaTeX on 30 Apr 2025 from source files dated 1 May 2025
f961026b-f72f-5bd7-9f75-efa7f932577e